



流寇長編



流寇長編卷二十

順治三年丙戌正月己酉朔

賊盡括公私金銀載以舟沉之彭山江口楊展得之以養兵故  
上川南獨饒

是月十六屠殺川民始至五月止凡千餘萬人

己巳李赤心寺圍荊州赤心高一功張能賀蘭攻北城劉汝魁

劉芳亮馮養珠攻西城李友貞吳汝義党守遠楊彥昌攻南城

張勳田見秀袁宗第攻東城田虎扼截東路環攻七晝夜城無

流寇長編卷二十

崑山吳喬脩齡輯編

吳江戴笠耘野



完堞尋以清貝勒兵至來援遂拔營去  
二月戊寅朔賊攻上川南至夾江而還

是月猷賊盡屠川西川北州縣之民以斫手為驗、功處積手  
如山發兵四出逢人即殺如是半載千里無烟曠如大漠  
猷賊運盡怨鬼侮之一日獨坐噉蒸餅空中出手無數奪之又  
忽聞西廂屋中有絲竹聲往視之見女人十餘皆無頭者共弄  
樂器賊驚仆成都每室屋至夜聞人語賊之夜巡者往、群  
鬼擊之兵不敢出猷賊畏之移兵出城駐中園城中唯空屋眾  
賊薪蒸必入城析民居

三月戊申朔李錦兵攻房縣屯白馬洞

永曆帝幸全州又幸武岡

七月幸靖江

九月幸柳州又幸

象州

七月癸亥賀珍破寶雞擒斬清官單世賞

甲子破鎮安又破同州

八月甲戌朔

猷賊焚蜀宮及民居之未盡者石礎柱聚木燒壞之城中空  
悉為焦土

封孫可望為平東劉文秀撫南李定國安西艾能奇定北皆將  
軍以兵北行

四川總兵賈聯登屯中江猷賊攻之聯登僅以身免

九月甲辰朔

敵賊又陷順慶屠之北屯于西充金鎮鋪治舟楫將趨湖廣自言是年有身劫欲棄衆脩行于武當山過劫再出爭天下而殺人惟意不論罪有無若不為清朝所誅其党亦必有變矣

成都既空是月楊展曾勳以兵至成都職方主事程翔鳳監軍勳翔鳳守成都楊展北進前鋒至保寧遇清兵展引兵還成都不可守還守嘉定勳守雅州

搖黃年三家降于督師王應熊

十月癸酉朔

賊將劉進忠知必及禍棄敵以其兵至安岳諸生張象升結寨

自保進忠與象升弟象樞言欲就曾英合營乞象樞往先道意議定進忠以衆至合州疑英欲併己七月北去過保順英遣部將于大海高標追及于遂寧進忠還戰大海敗標戰死進忠進至百丈關與清肅王遇降之同至保寧肅王遣候騎百餘至西充視賊營壘進忠為導大兵繼進時敵賊有党數十萬不設游騎不知清兵之入川有言之者以為妄殺之十二月十一日清候騎已至營前敵賊不甲以數騎出視與清兵隔一溪進忠指曰此八大王也清將雅布蘭射之中左乳墮馬清兵少不敢入營孫可望等以其兵遁

梟敵忠于成都北門

或云青羊宮

敵賊埋冢生艸叢立人踐之輒生

惡瘡有虎齧人行者由他道為

可望等奔至重慶欲渡江無舡平寇伯曾英駐軍江南遣兵渡江戰于一碗水死賊力閉英兵敗賊以英舟過江英戰又敗墮江死英部占春于大海以水兵走涪州步騎隨王祥走遵義可望兵還屯重慶三日隳其城將由遵義至雲貴時福建有詔許賊忠降者免罪立功李定國艾能奇以作賊終不了亦欲降至遵義

敵賊女僭汪兆麟桐城辛未進士國士之季子辛巳敵賊攻桐城掠得之年十九敵賊無子唯一女以配兆麟威權冠于諸賊凡敵賊剥皮剖腹抽筋剔骨鋸解斧斲諸惡毒之刑皆兆麟道

為之所殺以萬計至是諸賊問曰老萬歲已死吾輩宜何如兆麟曰將軍輩依前行事耳能奇怒曰老萬歲時汝為宰相唯勸殺人以致人心離叛天下名我輩為賊事至今日汝尚欲依舊作賊殺人耶即斬之四分敵賊禁丁

十一月癸卯朔

永曆帝還入桂林

時蜀地多歸清諸將及解而占春部將董子金戰勝于萬縣河灘袁韜亦反閉入佛圖關欲取重慶冬至大會韜自以位高坐占春上占春不平

是年八月乙未

順治四年丁亥正月癸卯朔

四川亂久野無耕者大飢賴土司之粟雅州有大渡河越雋衛  
接濟斗米值銀十餘兩成都重慶值四五十里保寧賴清兵運  
陝糧亦十餘兩成都清兵駐為舍人無可食者又起大疫死者  
何計數虎復為害渡水登樓搜人殺之不食亦千餘人犬食死  
人慣見人狎狎如虎狼然凡五六年乃已

三月永曆帝幸南寧

是年春清將趙崇貴圍提兵官朱化龍于茂州三閱月城破崇  
貴與化龍盟還屯龍安圍城時男子肉一斤七錢婦人肉加一  
錢墓中死尸枯骨猶屑而食之

巡撫馬乾與清兵戰死于內江曾英部將王猷迎清兵入重慶  
時王祥屯遵義之綏陽于大海李占春屯涪州譚文屯萬縣譚  
弘屯夔府譚詣屯巫山縣副將胡雲鳳屯忠州

胡雲鳳家口舟在夔府譚詣之將鄧希明劫雲鳳妾水死時徭  
黃之賊降于王應熊者屯夔府北岸乏糧雲鳳欲用之報怨于  
萬縣小溪口渡之登南岸譚文劉五重奔雲陽江以南皆徭黃  
矣惟必反王屯田達州未渡江

清兵至漢中賀珍不敢敵以數百騎南奔至夔州求南渡知府  
程正典不許珍以小舟渡屯南岸

四月清江西總兵金聲桓內附

五月清廣東提兵官李成棟內附

騰蛟敗後赤心等以五月從巫山渡江譚詣水師聞赤心至潰  
賀珍復過北岸居下關城赤心等又至建始時永曆帝命宗人  
朱容藩以都御史入蜀經理在建始赤心至人懼欲走容藩曰  
走即死矣坐而說之可為我用遣人謂赤心等曰經畧奉朝命  
至此欲與將軍議公事赤心輩已諱言賊聞之大喜相率上謁  
容藩以立功成名聳動之皆請受節制乃令屯于建始

六月庚午朔

清兵至涪州敗袁韜于小江口韜奔輜重入牛皮箬李占春于

大海奔夔州



清兵進至遵義王祥在綏陽不降貴州提兵羅熊許降不至清兵孤軍深入懷惧殺故將勸進兵者退歸重慶王祥追擊清兵勝之遂屯遵義

楊展在嘉定大興屯田清兵至攻圍五日解去展遣兵追之不能勝

屯田有年上川南兵民足食八月遣裨將楊崇芳李一進陳應宗黃國美恢復成都清安綿道梁一訓降賊也以殘民北走至綿州盡殺之

督師閣部長壽伯王應熊卒于懷仁

七月庚子朔永曆帝至潯州八月成棟來迎永曆帝還肇慶時

湖南士飢清兵皆北去督臣何騰蛟制臣堵胤錫等奏恢復湖南

九月戊戌朔

清兵水陸俱下次忠州之無風波朱容藩令李占春于大海以舟師禦之來去如神清兵不能水戰又風雨作山岸泥滑馬不得騁占春大海以步兵蹙之清兵不戰潰去焚舟千餘得器仗無算貝子從遼州小路還保寧大海等軍散大振重慶尚為清有

十月戊辰朔

朱容藩督于大海李占春譚文譚詣譚弘及搖黃呼陳景三家

之兵前偏沅巡撫李乾德與袁韶自涪州來王祥將栢永馥亦至共克重慶清兵還保寧遂取川東之地

十一月丁酉朔辛酉冬至拜龍亭容藩自以宗室新有功位宜第一乾德自以舊大臣不為下容藩賴占春致勝愛重之乾德久居袁韶軍中心庇韶占春韶遂勒兵相攻占春不勝還涪容藩還夔韶乏糧掠民殘民奄、依占春

趙雲貴曾圍朱化龍既克而與之盟人疑之雲貴曾與楊展曾勲約為兄弟提督樊一衡令楊展招之雲貴遂來歸仍屯龍安武大定賀人龍之部將也孫傳庭殺人龍令人龍部下議統領者自來林秀統內標武大定統外標統領宜用林秀林秀讓乃

以大定統為闖賊破西安大定降之闖賊敗大定保三台山清兵圍之大定以精兵八百人決圍出西走得秦王之子奉之秦王子以為靖鹵將軍五月至四川大定本欲與雲貴合雲貴聞

大定曾殺同類而并其兵惡之納秦王子而拒大定

容藩招降李赤心又督李占春于大海有真風波之勝顯驕聞

齋奏者言廣西失守乘輿不知何在五月自稱楚世子設行臺

于下関城承制封拜僚屬有光祿鴻臚之名于是呂大器四川

巡按錢邦芑移檄討之時清兵在保寧李占春水師屯涪州江

中于大海屯雲陽譚詣屯巫山縣譚文譚弘屯萬縣之天字城

袁韶屯重慶之寨山坪殘民復被殺戮存者相食叙州以南楊

展有之雅州曹勳有之龍安趙雲貴有之永寧侯天錫有之蘆  
衛馬應試有之遵義王祥有之各守其地殘民少蘇惟成都民  
食草根蓬子無復人理

以龍安道唐天顏為右僉都御史巡撫川北駐石泉受李乾德  
節度

初王祥戰勝于遵義遂以兵至樂英寨楊展前在永寧時此  
後命次于明新守之祥執明新取其寨後釋明新歸嘉定展恨  
之祥以兵攻貴州不克而歸貴州官將約展同攻祥展令子璟  
新以其舊將應之璟新年少不知兵舊將不受約束八月至蘆  
衛殺馬應試永寧堅守攻之不克圍之王祥遣兵援永寧乘大

霧出戰璟新敗還威名以損

武大定以九月至眉州屯奏授靖鹵伯楊展又移表韜于捷為  
大定于嘉定皆給以穀

是冬封楊展廣元伯提督秦蜀諸軍務加少傅太子太保

閣部文安之謁朱容藩于下関城見其稱楚世子承制歸說一  
隻虎王友進等不用其號令容藩勢屈

順治六年己丑正月庚申朔

永曆帝在肇慶

孫可望自滇遣巡撫楊畏知龔彝至肇慶行在請封平東王賜  
勅印且言不封王亦可但須位在李定國劉文秀上乃封可望

錦國公遣大理卿趙煜同往過梧州時內閣督師堵胤錫為金堡所叅過梧州遇畏知遂矯詔封可望平遼公使者至潯州慶國公陳邦傳又矯詔封可望為秦王遣胡執恭從間道往先三日至可望喜平遼公詔至可望不肯受命知二詔皆偽下執恭畏知于獄請命朝廷何者為真時高必正已封鄖國公自恃前輩詬斥之乃止

金聲桓卒

清兵復入湖南收四郡地

朱容藩至萬縣天字城招徠黃賊白蛟龍楊秉胤為護衛糧之五月攻石柱司石柱知縣李占春不受容藩命求救

占春應之擒蛟龍容藩敗走至雲陽為亂兵所害

月李成棟兵潰于信豐自沉水死

五月封孫可望為秦王

以上川南道范文光為川北川西巡撫監調入秦兵馬

七月李乾德武大定袁韜謀殺廣元伯楊展初朝議分四川為兩巡撫東楊喬然西北李乾德給巡撫關防時武臣多有關防袁韜獨無乾德久居韜營欲結之乃鑄印與韜亦置其舊關防而自鑄兵部印用之稱尚書二人相得甚歡時川地皆荒韜兵擣桃李為糧乾德求救于展使人迎至嘉定時夾江嘉定洪雅諸處皆展屯地州縣稅悉歸于展乾德欲自轄州縣而展唯

主兵事不能得遂銜展及展移表韜屯犍為時重慶宣展請資  
乾德糧移鎮之乾德以為逐已益怒佯許之受展餽往依表韜  
韜兵苦飢多走展、于璟新收為韜益怒展大得敵賊銀人皆  
乞之展散以市牛種屯田不能屢應武大定初至甚感展援濟  
鎮雄土民作劫展合大定討之已而中止大定謂展不信已亦  
心携展皆不慮也表韜生辰展自往賀之三怨合謀醉展從人  
而殺展

八月共攻嘉定璟新在峨嵋調兵遠不能久圍久之李占春以  
舟師至欲兩解之乾德等不聽占春捨去璟新与大定戰于竹  
公溪兵敗其將曹章楊崇芳戰死徐尚朝所傷大定一指友燕

等奔叙州十一月璟率新餘兵千人奔崇經出三堪武大定追  
及盡擒其兵璟新僅以數人免走保寧降于清巡撫李國英奏  
為副將璟新妻程氏獲于大定不受辱自刎死乾德欲以尚書  
經畧主餉而大定韜分有展地與乾德數縣尊以宣名

樊一衡遺書責乾德曰嘉定峨嵋間二三遺民不膏賊刃者楊  
將軍力也背德棄盟取人于盃酒間天下其謂之何乾德咲曰  
救時大計豈腐儒所知蜀人以此識乾德之無終占春素受展  
惠欲為報怨不能勝曹勛與展厚寤無一言時韜與大定甚強  
以殺展故人心不歸

十一月堵亂錫卒

順治七年庚寅正月乙卯朔

永曆帝在肇慶清師過潯帝幸于州

十一月庚辰朔日清師克廣州次日清師克桂林督師瞿式耜  
總督張同敞死之

永曆帝幸潯州又幸南寧

順治八年辛卯正月己酉朔

永曆在南寧

二月孫可望遣鐵騎五千迎駕其將張護軍逼問內閣嚴起恒  
今封何王起恒諭以迎駕功甚大若以封爵請則失本懷語不  
合起恒投水死殺樞臣楊鼎和駕幸土司可望驚惧自迎永曆

至貴州頗守臣禮起恒高之立孫

月詔以李乾德為經畧陝豫川湖雲貴六省兵部尚書封武  
大定犁鹵侯表韜定西侯諸將屯地如故

五月封孫可望為秦王

八月劉文秀自建昌出聯絡川南川西鎮將遣人至嘉定招武  
大定表韜不從文秀屯兵清竹溪大定將張林秀屯兵榮經林  
秀戰敗死大定韜焚嘉定遁去文秀既得嘉定遣人招大定于  
茂州大定見茂州不足居遂降于文秀表韜李乾德亦為文秀  
所獲送于可望乾德沉江死可望曰武大定尚有戰名表韜匿  
山中盜百鷄豚燒食之乃与我抗耶以大定為護衛韜隨營而

已川南川西又屬可望時明臣皆盡唯都御史范文光駐成都  
唐天顏駐石泉亦與文秀合

九月孫可望自雲南至貴州遣其將白文選至烏江與忠國公  
王祥盟欲與合兵祥不從可望乃攻祥、敗奔至南川縣鳳皇  
嶺自刎死部將皆降唯總兵劉之復焚祥屍携其婦護祥妻子  
走涪川投李占春同占春守境又為可望所獲遵義重慶可望  
據之

可望遣其黨張虎聯絡西十三家李赤心等并於大海李占春  
譚文譚弘譚詣等虎入西山劉體純等所居以布為重門虎至  
體純等安坐不動謂虎曰我等故與敵忠約為兄弟秦王姪也

汝為之使見吾叩頭而已虎叩頭階下答可望書皆甚倨又往  
見李占春占春曰汝主雖不似前人之屠戮而志欲自取不為  
明朝我肯通賊乎揮之去可望遣兵襲占春戰於涪州占春兵  
善水戰每遇必捷可望兵多分兵四面擊之岍上皆列炮占春  
兵少不能支遂以部曲順流而下于大海率兵隨之同至湖廣  
降于清授于大海襄陽水師總兵官占春弄妻子隱姓名孤身  
遁入華山脩道清朝令人物色得之以為黃州叅將鬱、未幾  
卒

三譚降于可望夔門一帶皆為其有

蜀地亂久成都在城中襟木拱把蒙茸狗食人肉憤鋸牙若虎狼

聚為寨兵不能攻虎越屋搜人齧殺之弃去不食荒城中遺民數百家日有虎暴有經數十日而一縣之民食盡者溱州人逃入深山草衣木食久與野鹿無異見清兵以為敵兵復至驚走上山馬不能追身有毛云

順治九年壬辰正月癸酉朔

永曆帝至貴州駐蹕安龍三月吳三桂兵入成都巡撫都御史范文光仰藥死時劉文秀還桂州白文選守嘉定清兵至嘉定文秀以舟順流而下巡撫川北僉都御史唐天顏都督僉事曹洪李一進平遠伯朱化龍死之清兵又入重慶

六月李定國奏桂林之捷

八月劉文秀攻重慶以象攻城破之城中清兵皆沒

九月文秀與張先壁以兵至保寧清兵擊之擒殺皆數千人文

秀先壁以殘兵數千遁歸貴州可望奪文秀兵殺先壁順慶中

江一帶皆歸清

十月李定國告衡州之捷

李定國以兵復湖南諸府寧夏馬寶反正後在嶺南封安定伯鎮德慶州肇慶既破寶以兵數百遁入衡州深山定國下衡州舉人吳秀芳勸使乘時建績寶從之定國南攻永州清敬謹王追定國大軍先發自以千騎押後寶兵出山適與王遇奮戰殺王從騎皆盡定國返聞與寶夾攻大軍既失主帥前後受敵萬



餘人無一存者寶隨定國去定國死歸吳三桂後三桂反時寶為盡力每戰皆勝殺清兵數萬人三桂死後隨眾降清朝廷欲恕其死而恨之者眾辛酉十月副于萊市

順治十年癸巳正月戊辰朔

永曆帝在安龍

二月李定國南奔

孫可望敗于武岡引還

清兵還漢中欲棄保寧巡撫李國英自任能守乃令鎮之可望遣狄三品割耳楊三守嘉定

時南北用兵北以保寧為大鎮中江順慶為邊南以嘉定為大

鎮成都為邊

是年李定國以兵復廣西孔友德自焚死

宜是定國破桂林時事

順治十一年甲午正月壬辰朔

永曆帝在安龍閣臣吳貞毓以可望不臣密召李定國以兵入衛事覺被害

定國兵至廣東高肇諸府皆歸附攻新會天返風砲傷兵而敗七月可望遣其將興國侯馮双礼以兵萬人擊定國于柳州双礼貳偽敗兵皆獲于定國

順治十二年乙未正月丙戌朔

永曆帝在安龍

順治十三年丙申正月庚辰朔

永曆帝在安龍

二月李定國帥師至安龍奉永曆帝幸雲南

孫可望遣其党白文選移帝于貴州文選惡可望犯上合于定國使奉帝入滇而自為內間

四月封李定國晉王劉文秀蜀王白文選鞏國公諸將封爵有差

順治十四年丁酉正月甲辰朔永曆帝在雲南以清兵入貴州召劉文秀還雲南令舊鎮曹勳統趙友燕曹昌祚劉耀守成都

威寧伯高成恩守雅州

八月孫可望反使馮双礼守貴陽擁兵四萬餘以白文選為大  
招討冠軍將軍領萬人先發時諸將皆惡可望文選至文水即  
反正歸雲南馬進忠與弟惟興寶皆心惡可望進忠有兵萬餘  
北安順時惟興寶從可望兵至晉安文選已反正惟興謬謂可  
望曰大眾已發豈可中止可望信之進兵定國文秀屯兵曲靖  
可望欲夜襲營馬寶見國兵少謬語止之可望謀斷糧寶又止  
之可望遣張勝與寶以精兵萬人襲雲南城寶密告定國文秀  
曰精兵已出擊之必勝雲南守者宜振鼓勢以待可望令我三  
日至我以五日至也定國文秀文選以兵擊可望戰平旦至辰

未決六安侯李本高奮矛而前馬陷泥淖中為賊將陳羅漢所  
殺他將射殺羅漢秦安伯竇民望引酒斗餘大呼陷陣文選繼  
之殺數十人國兵死戰可望兵敗馬惟興之兵為西偏返戈而  
攻可望奔軍走遂大潰文秀文選急追可望令不得收散卒定  
國以兵安輦轂初張勝與馬寶襲雲南寶攻嵩明州縱兵剽掠  
遂以五日至會城勝盛氣而進知可望敗于交水掠南廂而去  
至淖水塘遇定國兵寶捲旗來歸勝走擒斬之

可望敗奔從兵不及數千沿途飢凍皆怨詬惟死党張虎陳國  
能等數百騎從之斷鐵索而東至安順馬進忠閉門拒之可望  
亟去進忠遣三千人追之至威清馮双礼謬迎之而使人謂文

秀文選令速來追賊使其子天祐斷可望兵之東還者十一月  
可望至貴州訝後兵無一至者而文秀文選已距城三十里貽  
書令改圖可望亟走双礼自追張虎擒之斬于雲南逆党王自  
奇閔有才王顯名李定等俱伏誅可望降于清

順治十五年戊戌正月戊戌朔

自可望破後上下晏然初蜀王劉文秀追可望收其兵三萬人  
定國不悅召諸將論功分兵多自予文秀以正月還雲南不樂  
曰晉王必敗國事四月病卒遺表有言臣兵二萬在黎雅間埋  
金二十萬臣之將郝承裔知之請駕幸蜀就十三家之兵出營  
陝洛庶可轉敗為功定國聞而惡之

七月定國與祈三昇白文選三路出師十二月三路兵皆敗于清定國之敗以大風北來火藥返焚也

清兵遂入雲南

順治十六年己亥正月癸卯朔四日駕至永昌定國亦至駕南出定國守大理白文選以敗兵至請自斷後令定國扈駕定國遂行吳三桂兵至文選戰敗走入山定國戰亦敗自奔去駕南行從者多叛乃謀入緬甸廿八日出鐵壁關至緬境緬人迎者猶如禮

二月壬戌朔泛南金沙江十八日至井梗諸將殘兵南奔掠食緬地緬人出兵拒戰隨駕而不及者多被殺

三月緬人殺從官數百人

八月緬人脅沐天波夷服跣足領海邦夷酋以拜緬君

是年清四川巡撫高民瞻入成都總督李國英入重慶

滇中護衛都督陳建遁入四川兵少畏為人所併詐以其妻稱皇后奉之所至百官朝見至雅州事敗高承恩數其罪分建所部擊建將殺之承恩性好殺下不附又欲取道西夷以入緬甸所親曰道險婦女多難達承恩欲盡殺其部下之孥以精兵去言于部將郝承裔承裔之父本流賊部帥于蓄承恩死時以承恩善戰使領其兵承裔在劉文秀部下文秀死歸依承恩素相親善至是承裔懼謀于陳建、說殺承恩是夜承裔以承恩令

傳建兵三更入宅承恩踰墻單騎走建引兵追得殺之承裔駐  
雅州是年譚詣弒其兄涪侯譚文與譚弘降于清川東亦歸清  
矣

陳建至嘉定降于清提督李國英郝承裔至成都降于川撫高  
民瞻遣還至雅州全川皆為清有惟夔門十三家未降承裔見  
成都清兵寡悔降有貳志

順治十七年庚子正月丁巳朔

八月郝承裔反于雅州以其部將秦有功湯克勝王功臣艾奇  
英為四鎮守竹箐關

十月承裔欲立慶符王而奉之時舊帥曹勳辭兵久居大渡河

所承裔以勳有名邀至雅州議之勳曰雲南全力不能支將軍  
數千兵三縣地豈能有為不如已也辭歸清提督陳蛟麟至邛  
州十一月承裔擊敗之遂守邛州次年二月清兵由小路繞出  
竹箐關後承裔奔關焚雅州走崇經兵散被擒斬于重慶

順治十八年辛丑正月辛亥朔

二月文選定國以兵迎駕大破緬兵于錫波江進至大金沙江  
終不得駕所在還兵文選為其下所劫降于清

五月緬人尤其君召兵殺之立其弟為王七月又大殺隨駕者  
吳三桂與其部將楊坤謀欲取永曆帝以為功亦得如沐氏世  
守雲南上疏言之得許三桂嚴檄緬人令縛送之故緬人先殺

後者

十二月丙午初三戊申日吳三桂兵至緬境緬人紹永曆帝以定國兵至昇帝疾走渡江甲寅三桂擁帝去以捷聞次年某月得命進帝帛以崩太子亦殞

緬人自萬曆中絕貢據麓川南甸八百媳婦之地雄視諸夷而與古辣暹羅為世仇帝之從官在道相失馬九功江國恭走古辣總兵溫如珍走暹羅暹羅王愛如珍妻以女而如珍女故為定國妻于是間道相約連兵攻緬九功等亦招得潰兵數千亦致書定國攻緬兩國之兵俱發隨定國至猛累而永曆已北去定國自投地痛哭三日不食具表告上帝自列罪狀祈死憤甚

發病死時壬寅六月二十九日也兩國之兵大失望各引去其子嗣興與雷朝堅等以十月三日自慢法詣三桂降定國葬處春艸不生蠻人過之必跪拜躑躅乃得去

三桂既弒永曆帝自謂于清有大功必得世守雲南矣忽承撤還之命驚怒而返己未七月三桂死眾潰家口之在貴州者皆為水西所殺于自經于雲南諸壻皆誅焚三桂屍送骨至京辛酉十月于萊市以石杵碎而揚之其父襄亦發塚焚屍若不弒逆即無世守雲南之心被撤亦不反無此滅族絕種之禍人謂有天道焉

初李赤心等受朱容藩命屯建始容藩自稱楚世子赤心等不

受命容藩令與文安之結若西山中赤心死養子來亨有其衆  
袁宗第賀珍據大寧大昌劉體純拓天寶據巫山巴東來亨馬  
騰雲党守素據竹山房縣興安歸州王光興據建始施州衛雖  
受封爵自耕自食不與外人接

康熙元年壬寅正月乙亥朔

李國英請取十三家清命湖廣陝西河南四川四省合勦  
十二月國英入夔府年久無人伐木開道以入

康熙二年癸卯元日清兵奪羊耳山袁宗第夜遁深箐中國英  
兵屯大昌七里埧宗第屯茶園坪山峻甚國英遣兵攀羅而上  
走巴東賀珍子道寧以兵數千降大寧大昌皆平

二月清兵入巫山縣

五月鄭蛟麟兵至巫山郝永忠率其衆至巴東與袁體純袁宗  
第攻七連坪清之湖廣兵敗欲攻巫山衆議孤城難守移趨夔  
門國英蛟麟不可繕城隍具炮石于北城下置梅花樁以木丈  
餘者埋入地數尺上留數尺或高或下六七木一攢敵至不得  
進又不能拔樁外穿品字坑于城外高處立敵臺平處築民寨  
已而劉體純郝永忠等合兵數萬攻巫山八晝夜

九月城內知賊疲發兵出戰賊敗走郝永忠退屯大寧其下多  
降清將圖海傳夸蟾等率陝西兵至

十二月清兵入陳家坡劉體純自殺舉室自焚清兵乘勢徑進

至黃州坪獲永忠宗第李永亨居茅麓山寨高險難攻圍之斷其出入道曰通梁李國英自黃龍山移屯吳家庄拒茅麓下清小路來亨遂困

康熙三年甲辰六月十五日来亨以兵衝李國英壘幾入之而敗

閏六月十九日来亨又衝通梁又敗焚其妻子而自縊獲數千人皆殺之馬騰雲拓天寶王光興降于湖廣

闖賊遺党賀珍合郝搖旗李本崇党守素李永亨等猶據施巫鄖竹搖旗最著距襄陽五千里公行剽掠官司苟安不之問至害一司道事不可已癸卯秋發兵進勦甲辰平之寇事乃畢

三桂移鎮雲南復發兵攻水西安酋守險不能入水西地產良藥遠人寓採為安酋初聞兵信料民非土著者逐之有江西採黃連者四人被逐無所歸乃謁三桂言水西後峻絕酋不守有小徑可登三桂遣五千人以薄脫羊皮渡烏龍江溺死者半攀木而登多墜死得至者十一兵既登縱火鳴鏡前山守者驚潰安酋逃去借隣洞兵來攻不得入不知所終甲寅年三桂自以兵駐營德安酋妻奢氏棄遺民據故地三桂畏其梗雲南道招下之許守水西三桂死後諸姪爭立奢氏乘間以兵盡殺吳氏之在貴州者



流寇長編始終錄

將亡妖孽

蘆溝橋為京師西南孔道崇禎十年于橋東岸築一小城以守橋有二門左曰順治右曰永昌恠哉識也

是年武科陳啟新上書言事內旨特授吏科給事中上謂廷臣党比故出奇以聳動人心而啟新庸夫徒為駭笑

韓城薛國觀官僉都溫體仁引之入閣尋為首相十一年行考選改授法行人吳昌時已得吏部主事上性好出奇御下以破

舊習進士考選入臺者黎玉田與歲貢府同知許自表易位如是者比、昌時改祠祭司謂是國觀所為深恨之上于平臺召對時歎廷臣黷貨國觀進曰若東廠得人貨何能行廠閣王化民伏御座後聞之汗下化民故善昌時犄角報復國觀刻薄在臺閣多所挫折恨之者衆上令擬諭獎勵邊帥誤作督責語上怒擲之地詬散聞外于是科臣袁愷臺臣郝晉等劾其擅權招賄遂逮其黨憲副葉有敬戶書傅永淳戶侍蔡奕琛下獄國觀致仕至家上疏謝恩并自白云袁愷為昌時之所使考選改授聖主搢縱獨裁怨歸臣下有旨奏內事着入京訊理十三年五月國觀至京師候審昌時知上意好察欲出奇制勝知其甥內

閣中書王陞彥故與國觀善必候問令化民遣役伺之陞彥果至執以聞并以下獄坐國觀候審錯刺賜自盡陞彥漏泄機事斬

庚辰殿試後上召二甲進士已選者自改定之部屬知州改簡討部屬改知州科改道餘部改于吏兵蓋謂威權獨運吏部之弊自此絕也

王太監云黃石齋廷諍天顏震怒高大家宰在列忽退至殿隅徐察其故則褲中遺矢矣

周延儒辛未會試得張溥援之入翰林延儒罷歸溥合東林物力數十萬緡賂內侍復起延儒俄溥病死大權歸于吳昌時竟

成二人殺身之禍人皆為溥幸之

王永積以周延儒力十五年十月八日得為職方員外得警報戶部奏遣候補周而淳王永積等八人出京催在途餉銀延儒令兵書張國維奏邊事危急職方乏人乞勅王永積即日任以資料理未時進疏夜半得旨次日永積到任十六下戶部疏而淳倉皇就道被殺者三人延儒長技惟在此等

周延儒再相能中上意禮遇極隆嘗于內廷賜坐議事大璫跪進茶延儒在上前不敢避亦坐受之內侍皆怒十六年四月延儒以兵事出至通州諸璫盡發其奸上尤怒其縱東兵出口去以得大禍蓋東兵歲蹂躪內地建議者謂北人畏暑熱守諸

隘口使不得出彼將自盡上深信之敕諸臣奉行令匹馬不返諸臣空文復命上以為誠然延儒亟欲兵去亦謂守口者嚴故不時出索本兵張國維令箭開古北口令去京城喧傳延儒受賂縱敵言聞于上五月六日烽息解嚴十日延儒還朝入見上猶未露辭色十五日齋閣臣羊酒次輔陳演三輔蔣德璟疏辭得許延儒辭亦得許二十三日傳諭諸臣平臺候旨則謂首輔周延儒奸貪詐偽大負朕躬着各議處回奏明日諸臣奏上盡力掎擊上旨稍存大體延儒拜辭棋盤街賜路費百兩出都後言者益眾袁彭年等欲自益其比瞻之罪蔣拱宸等欲伸宿憾極論延儒并劾文選郎吳昌時濟惠七月二十五日上御文華

殿以啟衛刑具親審與延儒同往通州者兵科方士亮職方尹明興道臣蔣拱宸亦與審昌時受刑具承招權納賄狀氣絕停刑詢延儒客董廷獻與縉紳錄令具指之廷獻偶見福寧道施元徵姓名指奏之命提問下旨逮延儒昌時醒奏曰羅山之敗皇上發銀三千贖難民兵部遣兵二千護勅其後兵銀俱喪拱宸亦奏大捷豈非欺君拱宸曰初交兵失銀後以各將用命復勝上怒命侍閹擊拱宸悶絕伏地上推玉几入宮諸臣下獄十月延儒逮至自求戍邊不許十二月昌時奔市延儒賜自盡京城破元徵廷獻得出

唐之崔胤常貽範柳燦明之周延儒吳昌時情狀酷類

十六年十一月二十六日上御皇極門召吏兵堂官曰文選職方用人之地今文選用沈自彰職方用張法孔舉朝莫喻其故徐察之則方岳貢入閣賜對所荐也二人皆有恩于方故荐之方守松江有清正名初相即為此事

十六年九月廿三日雷擊太廟門吻縱橫神主墮地先是壬申祈穀前一日神主墮地不以聞至此不可得掩

十月十六日夜祭社稷壇初獻暴風作燭燎滅帝懼亟還宮官役携臂扶肩相呼而出至西長安門星月皎然

是年京中市肆于錢器中多得紙錢黃昏貿易必擲水盞中有錢浮出買者即失去

是年八月京城人無貴賤老幼一病即死無頃刻延兵科曹良直揖客偃下即死兵部朱念祖拜客回跨檻即死宜興吳彥昇將之官欲登舟一僕死一僕買棺死于凶肆其友鮑為彥昇移寓先往彥昇至鮑已絕于座明日彥昇死金吾錢晉宴客語未終氣絕一家頃刻死十五人有二人跨馬先後行正笑語間前人已殞手猶揚鞭有一家長幼俱死隣人入其家見偷兒一立而舉手承囊一手簷上俯身受之皆已死九門共二十餘萬大內亦然

崇禎初僧毒鼓指天象示興化諸生袁靖曰天遣齋黃輩生人間不久將亂矣靖曰彼皆忠臣何以為亂僧曰積怨已久不為

巨寇則為亂臣也

松江諸生袁燦若于壬午年夢至一處見歷代創業之君議革命事彷彿識漢明二高祖有一人如帝者冠服披髮伏地鳴、  
愬枉高帝語之曰吾不能主此可問建文帝燦若問旁一人曰  
李自成當有天下乎其人曰却不是燦若先言之于人非附會  
也

宮中有密室久錮不許啟上特啟之見篋貯元朝會圖胡人華  
人分行而拜帝見之不樂此吳昌時親得之于內侍者世傳西  
三軸訛也

崇禎末商人販山東豆渡淮出之粒、作人首狀耳目口鼻咸

是

徽州牛生犢一身二首

乙酉元旦朝退寺人設宴于宮中天陰晦弘光君不悅諸內侍去憲格君曰不必朕坐此不久聞者失色

破城前十許日風大作拔去正陽門旗杆琉璃殿大樹

癸酉甲戌鳳陽生異鳥甚多兔頭鷄身鼠足供饌甚美犯其骨立死

乙亥賊焚陵

壬午秋甘肅巡按奏田間蝦蟇皆生鼠食稼殆盡

戊寅四月六月八月連有火藥之變而四月為甚石板平起空

中民家晉岳移置屋脊而晉不傾跨馱過其地者人馱俱在空

中馱腹腸潰破人墮地無恙

崇禎朝廷臣如錢謙益鄭鄮吳昌時周仲璉楊枝起曾應遴輩皆亡國先兆人妖也過江則馬阮等不可勝數矣

湖廣巡撫何騰蛟諳天象崇禎末 王揚基內監何志孔

談時事騰蛟附耳云賊已入晉燕分度前星易位帝星照南相欵啟不兩月遂驗

昔時臺省以彈射政府為名高崇禎末候考推官知縣謁政府自稱門下士俯伏而拜主人不能止連呼老師不絕士風如此亡國之先兆也

庚辰平湖諸生金惟鎮得心疾削其髮大言曰此世界不屬大明矣書三大字于壁間曰大清國下有大安國三字又曰城外猶可城內不忍言指其族人曾慶曰有無限兵馬清兵至曾慶起兵敗死

癸未上將祭廟鹵簿已陳忽見黑氣墮空中如有婦人白衣疾飛入宮衆皆見之

五月大雨沾衣如血雷電通夕次日太廟神主威橫或倒銅器被雷火焚為灰人又見太廟中鬼嘯呼而出

壬申蘇州舉人毛寬父為鬼所憑曰吾前世與爾子為建文將官守金川門彼開門降致吾家口四十皆死刀斧久欲圖報以

其福厚經數生皆顯官故至今為舉人駸衰矣而我徒皆從天而降紛圖報故我亦乘間報而子未幾寬死

此李模言

流寇長編

補遺

十七庚戌嗣昌奏云臣前在蜀揣賊東奔即調左良玉自夔巫  
而來迎頭勦殺已經奏聞至于飛飭撫道嚴督所屬防守城池  
差役誥誡絡繹于途後聞賊襲巴川又于正月初五日分頭差  
役諄切再三嚴守城守謹防狡詐假冒官兵乘夜剗襲續因猛  
如虎戰失關防又差役重加申飭二月初二日臣始發夔門至  
巫山縣初七日暮抵彝陵公署沿途接報正月二十五日賊過



興山無城之縣燒毀餘糧都司吳國懋戰死二月初二日至當陽縣攻城該縣督同鄉勇登牌放火箭大炮射殺先鋒十九賊開營向西北去初三日至荊門州被城上兵銃打死七八名星奔而去忽十一日一更襄陽府報火光四起見有紅衣七八人來去後又有十數人又有從清軍廳東夾道六七人理刑廳西夾道四五人賊眾漸集不滿三四百人午後方有二千人至初五日三更賊眾次由南門出官舍民居十去其四監倉庫焚劫襄府殿門亦焚國主巡道廊推官李知縣俱無下落六門鎖鑰未動三更火發而次日午後始有賊人二千則所謂全副盔甲三四百人又于何時闖入也此必預有伏奸從中發難約期舉

事先時發火馳馬射弓七八人十數人者皆伏奸為之賊反從外後期而至十五日夜主事余爵報擊賊黑犁虎供賊初四日抵襄一晝夜行三百里精賊共有一千餘到襄陽者不多孔貞會以初七日張應元以初八日方到當陽萬元吉副中軍李起以初九日方到荊州其餘跋涉險阻至十二三尚未能全到彝陵而豈能有及

廿二丁卯嗣昌奏云十九日接鄭治表繼咸塘報末云職轄五郡處、皆寇衝鄭鎮兵不滿萬分防鄭楚應宛南堵與洵初八日聞賊至當陽職已先檄鄭將余起元任光化之兵一千就近趨襄又先檄撫院發楚將劉承胤之兵一千任棗陽為襄犄角

仍檄巡道調度職隨親督鄖將賈一選徐勇之兵二千餘亦于  
是日趨均襄所以為襄計者不遺餘力知府王承曾沉湎醉鄉  
守備蘇得節署縣印穀城知縣李大覺相率怠玩既無盤詰又  
少偵探使巡道孤拍寬和遂致奸藏肘腋變起湏臾張逆于初  
六日始到初四夜內無多奸外無大寇見宿重兵全無擒斬如  
入無人之境襄王被害通判周過屏副將劉文昭先期分守樊  
城隔一江浮橋先折自斷援路克儉寔自罹伊滅臣既令撫臣  
宋一鶴東勦猢猻治臣表繼咸西控鄖均而襄陽重地未檄治  
臣移鎮者則以屢調左鎮自彝歸夔巫而來迎頭扼勦恐賊窟  
于東又竄于西則鄖均一路正當房竹興平奔突之衝不得不  
令鄖治力防之尚有正月十二日一檄謂賊已至達州過河東  
下若該鎮在襄過鄖方來賊越巫山透已歸一帶而承天祖陵  
荆襄藩封震驚可虞即該鎮當任其責毋謂不早言之此時尚  
不知該鎮西去迨差役趕至前途取具回文現在可覆按也臣  
即前奏正月五日檄襄陽道府嚴守城池謹防狡詐假充官兵  
乘夜齮割者亦于正月十八日到襄今差役自襄鄖回取具該  
道回文亦在可覆按也然則臣之調度雖以東西分責兩

內臣劉元斌還軍擊李青山御史王孫蕃劾其縱兵淫掠旨擊  
問此疏密封下科不抄傳司禮王裕民密報之元斌上疏辨孫  
蕃并劾裕民漏泄禁中事帝以孫蕃發姦進二級元斌裕民并  
誅

文燦所勦老回、混十萬等十三股聚屯嶠函間文燦招使降  
賊佯應而多所邀挾陝撫孫傳庭曰賊盡聚此我擊其西搃理  
擊其東不降則滅、此則敵賊在穀城不敢獨反因以兵出潼  
關擊賊屢敗之賊以文燦諭降帖上傳庭請降傳庭曰就總理  
降而仍屠掠偽也復進兵得文燦檄若為飭諭有司者謂吾功

已成母妬功而害之傅庭不得已旋師賊竟不就撫竄商雒入  
楚

吳姓撫山西謂諸將曰予在行間久知天道好還殺賊千萬有  
功無罪殺一二無辜脅從即有大罪况良民乎將領縱軍丁妄  
殺上天假手于賊以致喪敗不可不畏聞者惻然姓製白旗每  
出陣令脅從老幼婦女降者伏旗下一以散其党与兵士得直  
前殺賊一以全活無辜

辛巳冬山東寇熾請兵上命發京營五千往問兵部侍郎吳姓

近日練兵如何對曰將得其人乃可練京營諸將皆循資格而  
授非有拔之行伍擢自戰功者也今發不練之兵擊方張之寇  
萬一不虞有傷國威提督內臣王德化久言京營馬不滿萬又  
多瘦弱是晚上命發兵三千命四員  
督勦無功

閣臣溫體仁有心計每遇刑名錢穀姓名之煩多頭緒之紛糾  
者諸閣臣相顧攢眉獨體仁一覽便了曾不以舛誤駁改故同  
官心服其敏練而存心過刻伏机甚深又不肯批逆鱗其大  
過也當時言誤國內閣必指周延儒溫體仁言誤國本兵必指  
楊嗣昌陳新甲然歷數前後輔樞又推四人之才為最蓋將相

乏人故衆口所詆者居然冠軍國事所以不支也

此李清語

山東賊李青山據梁山以諸生王某為謀主分遣其徒據八閘  
梗運道以扶輔臣周延儒受詔北上二賊以門生刺來謁自言  
護漕有功延儒曰若漕舟無梗當請于朝授以官終護漕舡其  
年冬青山塞安山閘鑿水道十里通梁駟漕舟繫漕卒去焚掠  
至臨清搃漕張國維懼遠內監劉元斌以京軍勦海寇還合鎮  
兵擊之誘二賊降執送京誅之

枚卜閣臣召對面詰禮部侍郎蔣德璟言邊臣久任乃有建立  
薊督重任半年五易何以展布上曰不稱職當易德璟曰不稱  
而更曷若慎之于始上問何以消弭天變德璟曰蒼天在乎救  
民今為加派所困萬曆間各邊舊餉只三百餘萬今加新餉  
幾百餘萬又加練餉七百三十餘萬民何以堪祖制三協只一  
督一撫一鎮今增為二督三撫六鎮又有副總兵數十人鎮臣  
太多不相統攝督臣呼喚不靈以致兵不可用宜亟裁汰上頷  
之

乙亥戶部尚書程國祥

稅間架民情大擾山西巡撫吳牲

具疏以諫引陸贄諫唐德宗事有云陛下投珠抵璧上希堯舜  
當事者不當以德宗弊政疑誤聖德而在廷無一陸贄臣深恥  
之乞概行停止非獨為三晉之民請命也疏入不報

丁丑年 癸巳嗣昌奏賊之情狀伏山過夏至八九月乃發舊  
兵不滿四萬馬少步多不成氣勢理臣到任無兵可用臣八九  
月時邊塵不動可抽一二枝以應文燦之用

周延儒被召阮大鍼以家優未演自所作賜恩環傳竒跪泣求  
昭雪延儒以逆案難翻而君意中人為誰大鍼以馬士英對遂

于戍籍薦起為鳳陽總督

丁丑年 丁丑嗣昌奏大舉合勦御史就近紀功將戰勝情  
形先具大畧與塘報同發以便廟堂先行賞賚鼓舞人心隨後  
即將血級功次勘明不待部文竟自具奏其零捷小功行道府  
勘明報部不得踰兩月違者指叅考核

改編脩張縉彥為兵科都給事中縉彥為清澗令調繁三原皆  
在賊藪中無日不攻圍能拒守城皆不破在朝言兵事屢申窾  
上欲大用之故改官

萬斯同謂縉彥于順治間為浙江左布政多賞善結交文士  
多譽之不可盡信

孫傳庭已督真保賜劍丁丑進兵部右侍郎兼右都御史傳庭  
與洪承疇同入援承疇兵多道亡到又遲有詔迎勞

壬午南京兵部尚書范景文劾楊嗣昌削籍李邦華代

癸未河南巡撫常道立削籍以山西叅政李仙風代之道立貪  
穢持軍不律本依文燦取容又恐撫局壞連及會議裕州時聞

賊至潜伏唐泌間賊去乃出遇賊零騎顛慄墜馬陳永福嚴陳  
以待賊自去道立報大捷以自立異楊嗣昌惡之驗首功與劉  
盧二內侍所報異下巡按覈實又令科臣解學尹深文劾之上  
怒推舉主嗣昌曾奏其為功之首無以應也十一年十二月道  
立調左良玉之兵于陝州賊乘盧氏空虛遁入內浙熊文燦乘  
此劾之遂去

甲子武昌監軍道袁繼咸以辰州兵擊老回、乙丑至馬鞍山  
丙寅至白雲寨賊奔三里坂官兵追至油河嘴賊又奔商城

射塌天屯于德安之千石坂老回、營于黃陂之木蘭山柏木  
港戊辰楚撫方孔炤以都司楊大相等擊之乙亥老回、等屯  
于信陽欄杆店又西移平昌關瓦營楚撫方孔炤擊敗之

丁丑左良玉奉部調北援京師軍必有不肯渡河白生花等二  
十餘人良玉悉斬之軍中帖服

陝賊王老虎至慶陽城下巡撫丁啟睿兵至解去

丁巳陝督鄭崇儉罷丁啟睿代

八川之賊整十萬掃地王小秦王金翅鵬托天王過天星花關  
索相繼俱降唯曹搯不降與猷賊渡達州河西走壬戌破劍州  
甲子趨廣元從間道至百丈關欲入漢中署提兵趙光遠守平  
陽關甚固賀人龍李國奇兵又至乃踰昭化走保寧

王光恩大賊花關索也十一年反正十二年五月張猷忠反光  
恩被挾不能自立十三年與羅汝才等九人在夔門與提兵鄭  
家棟羅于莘等苦戰屢敗不降、督師楊嗣昌遣人招之與其  
副將楊光甫以 月降于督師年二十三



萬曆四十八年加秦良玉正三品服色子馬祥麟指揮使兄秦邦屏都司僉書弟明屏守備

傷哉武陵死于敵賊而暴骨七世開罪于門戶而蒙詬四十年此猶家事耳惟是輸平之勝算被格邊寇受棘以趨于正何意讀書萬卷赫天下之名公反不如羅貫中有北拒曹拯東和孫權之語耶

上命襄城伯李國楨掌營兵無寔籍惟以乏餉為言而上信任

之城破國楨被擒追駐殘

而死

貞武許重熙

傳宗龍自薊督罪廢而起為川撫又進本兵加嗣昌所荐用

甲申六月乙亥復懿文太子興宗孝康皇帝追崇建文君為惠宗讓皇帝景帝號代宗

甲申戊辰太后至

二月廿二袁繼成報自稱撫治

流寇長編補遺

富平王上則被賊獲請代父命被殺父恭藩也 查父名



十六終

